

ՀՀ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵԻ
ԻՐԱՎԱԲԱՆԱԿԱՆ ՎԱՐՉՈՒԹՅՈՒՆ

Ո Ր Ո Շ ՈՒ Մ թիվ - 347

ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ

«13» դեկտեմբերի 2023թ.

ք. Երևան

Ես՝ ՀՀ պետական եկամուտների կոմիտեի իրավաբանական վարչության ղեկավար Արման Մնացականյանս, քննելով՝ Արթուր Դերենիկի Դեմիրճյանի (անձնագրի համար՝ AV0221474, հասցե՝ ՀՀ, Վայոց Ձորի մարզ, Արենի համայնք, գյուղ Չիվա, 1-ին փողոց, 5-րդ նրբանցք, 4-րդ տուն) նկատմամբ հարուցված մաքսային կանոնների խախտման վերաբերյալ գործը,

Պ Ա Ր Չ Ե Ց Ի՝

2023 թվականի նոյեմբերի 09-ին Բագրատաշենի մաքսային կետ-բաժին է ժամանել քաղաքացի Արթուր Դերենիկի Դեմիրճյանի կողմից վարվող «RENAULT» մակնիշի, «065CU61» պետհամարանիշի տրանսպորտային միջոցը: Անցակետում ՀՀ ՊԵԿ ՄԴՊ վարչության Գուգարքի տարածաշրջանային բաժնի Բագրատաշեն և Այրում-Ջիլիզա բաժանմունքի, ԱՄՎ Բագրատաշենի աշխատակիցների կողմից տրանսպորտային միջոցը ենթարկվել է մաքսային տեսազննման և զննման, որի արդյունքում վարորդի խցիկում՝ հանգստի համար նախատեսված հատվածում (վարորդի նստատեղի հետևում գտնվող քնելու վայրը) ապրանքների հայտնաբերումը դժվարեցնող եղանակի կիրառմամբ հայտնաբերվել է մաքսային հսկողությունից թաքցված 74 կգ ընդհանուր քաշով «SORINI» գրառմամբ քաղցրավենիք:

Փաստի առթիվ Արթուր Դերենիկի Դեմիրճյանի նկատմամբ «Մաքսային կարգավորման մասին» ՀՀ օրենքի 313-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ ապրանքները, որպես իրավախախտման անմիջական օբյեկտ, վերցվել և ի պահ է հանձնվել Բագրատաշենի մաքսային կետ-բաժնի մաքսային հսկողության պահեստում:

Վարչական վարույթի իրականացման ընթացքում Արևելյան մաքսատուն-վարչության Բագրատաշեն մաքսային կետ-բաժնում Արթուր Դեմիրճյանը բացատրություն է տվել այն մասին, որ Բագրատաշենի անցակետով Վրաստանից ՀՀ ուղեբեռ տեղափոխելիս իր խցիկի ննջասենյակի մահճակալի տակ թաքցրել է «SORINI» տեսակի քաղցրավենիք: Սահմանը անցնելուց հետո մոտեցել են մաքսանենգության դեմ պայքարի աշխատակիցները և հայտնաբերել են իր կողմից թաքցրած 74 կգ ընդհանուր քաշով քաղցրավենիքը:

Վարչական վարույթի ընթացքում 21.11.2023 թվականին հարցում է կատարվել ՀՀ ՊԵԿ Արևելյան մաքսատուն-վարչություն՝ ճշտելու 74 կգ ընդհանուր քաշով «SORINI» գրառմամբ քաղցրավենիքի մաքսային արժեքը, որին ի պատասխան հայտնվել է, որ մաքսային արժեքը 09.11.2023 թվականի դրությամբ կազմում է ընդհանուր՝ 174843 ՀՀ դրամ:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու

կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

«Մաքսային կարգավորման մասին» ՀՀ օրենքի 301-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» ՀՀ օրենքի 313-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի հիսուն տոկոսի չափով, **բայց ոչ պակաս քան մեկ միլիոն դրամի չափով:**

«Մաքսային կարգավորման մասին» ՀՀ օրենքի 332-րդ հոդվածի 1-ին մասի համաձայն՝ մաքսային կանոնների խախտումների վերաբերյալ գործը քննվում է վարչական պատասխանատվության ենթարկվող անձի մասնակցությամբ կամ Վարչական իրավախախտումների վերաբերյալ ՀՀ օրենսգրքի 267-րդ հոդվածով սահմանված դեպքերում՝ տվյալ անձի բացակայությամբ, իսկ նույն հոդվածի 2-րդ մասի համաձայն՝ մաքսային կանոնների խախտումների վերաբերյալ գործը կարող է քննվել սույն հոդվածի 1-ին մասում նշված անձի բացակայության դեպքում, եթե անձը բացակայում է և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Արթուր Դերենիկի Դեմիրճյանը 2023 թվականի դեկտեմբերի 13-ին հրավիրվել է ՀՀ ՊԵԿ Իրավաբանական վարչություն՝ իր նկատմամբ «Մաքսային կարգավորման մասին» ՀՀ օրենքի 313-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն «Մաքսային կարգավորման մասին» ՀՀ օրենքի 332-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ, սակայն վերջինս չի ներկայացել:

Այսպիսով, նյութերով պարզվել է, որ 2023 թվականի նոյեմբերի 09-ին Արթուր Դերենիկի Դեմիրճյանը մաքսային հսկողությունից թաքցնելով, այն է՝ իր կողմից «RENAULT» մակնիշի, «065CU61» պետհամարանիշի տրանսպորտային միջոցի վարորդի խցիկում՝ հանգստի համար նախատեսված հատվածում, ՀՀ մաքսային սահմանով տեղափոխել է ընդհանուր 174843 ՀՀ դրամ մաքսային արժեքով (որի 50 տոկոսը կազմում է 87422 ՀՀ դրամ) 74 կգ ընդհանուր քաշով «SORINI» գրառմամբ քաղցրավենիք, այսինքն՝ վերջինս թույլ է տվել «Մաքսային կարգավորման մասին» ՀՀ օրենքի 313-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, Արևելյան մաքսատուն-վարչության գրությամբ և Արթուր Դերենիկի Դեմիրճյանի բացատրությամբ:

Հիմք ընդունելով «Մաքսային կարգավորման մասին» ՀՀ օրենքի 313-րդ, 334-րդ հոդվածները.

Ո Ր Ո Շ Ե Ց Ի՝

1. Արթուր Դերենիկի Դեմիրճյանին ճանաչել զանցառու «Մաքսային կարգավորման մասին» ՀՀ օրենքի 313-րդ հոդվածով և նրան տուգանել 1000000 ՀՀ դրամի չափով:

2. Որոշման մասին հայտնել Ա. Դեմիրճյանին՝ պարզաբանելով, որ «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն համաձայն՝ որոշումն ուժի մեջ է մտնում կայացման պահից: «Մաքսային կարգավորման մասին» ՀՀ օրենքի 334-րդ հոդվածի 4-րդ մասի համաձայն՝ որոշումը կարող է բողոքարկվել «Մաքսային ծառայության մասին» օրենքի 37-րդ հոդվածով սահմանված կարգով կամ դատական կարգով՝ երկու ամսվա ընթացքում:

ՀՀ պետական եկամուտների կոմիտեի իրավաբանական վարչություն

(ստորաբաժանման անվանումը)

ղեկավար՝ Արման Մնացականյան

(անուն, ազգանուն)



(ստորագրություն)

Որոշման օրինակը՝ 3 էջերի վրա ստացա.

(իրավախախտում կատարած անձի անունը, ազգանունը, հայրանունը կամ տվյալ անձի

ներկայացուցչի անունը, ազգանունը, հայրանունը և լիազորությունը հաստատող

փաստաթղթի տվյալները)

(ստորագրություն)

«__» _____
(որոշման օրինակի ստացման ամսաթիվը)

20__ թ.

Ծանոթություն. Սույն որոշմամբ նշանակված փողով գումարը ենթակա է վճարման Կենտրոնական գանձապետարանի №900005024055 հաշվեհամարին 19 ծածկագրով:

Սույն որոշումն անբողոքարկելի դառնալուց հետո «Վարչարարության հիմունքների և վարչական վարույթի մասին» օրենքի 88-րդ հոդվածով սահմանված կարգով և ժամկետներում ուղարկվում է Հայաստանի Հանրապետության հարկադիր կատարումն ապահովող ծառայություն:

Եթե առկա են վերցված ապրանքներ, դրանք վերադարձվում են «Մաքսային կարգավորման մասին» ՀՀ օրենքի 335-րդ հոդվածով սահմանված կարգով և ժամկետներում: